

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ZAKON

O DOPUNI ZAKONA O ADVOKATURI FEDERACIJE BOSNE I HERCEGOVINE

Sarajevo, juni 2018. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Vlada Federacije Bosne i Hercegovine predlaže Parlamentu Federacije Bosne i Hercegovine da, u skladu sa članom 172. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08) i članom 164. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03 i 21/09), Prijedlog zakona o dopuni Zakona o advokaturi Federacije Bosne i Hercegovine razmatra i donese po skraćenom postupku.

ZAKON

O DOPUNI ZAKONA O ADVOKATURI FEDERACIJE BOSNE I HERCEGOVINE

Član 1.

U Zakonu o advokaturi Federacije Bosne i Hercegovine („Službene novine Federacije BiH“, br. 25/02, 40/02, 29/03, 18/05, 68/05 i 42/11), u članu 31. iza stava 7. dodaje se novi stav 8. koji glasi:

„Za odbrane po službenoj dužnosti, visinu nagrade za rad advokata utvrđuje federalni ministar pravde.“

Član 2.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

O B R A Z L O Ž E N J E

ZAKONA O DOPUNI ZAKONA O ADVOKATURI FEDERACIJE BOSNE I HERCEGOVINE

I. – USTAVNI OSNOV

Ustavnopravni osnov za donošenje ovog zakona sadržan je u odredbi člana IV.A.20. (1) d) Ustava Federacije Bosne i Hercegovine, kojim je propisano, da je Parlament Federacije Bosne i Hercegovine nadležan za donošenje Zakona o vršenju funkcije federalne vlasti.

Ustavnopravni osnov za donošenje ovog zakona je utvrđen prilikom njegovog prvog usvajanja i ovaj zakon je do sada više puta mijenjan.

II. – RAZLOG ZA DONOŠENJE ZAKONA

Razlog za donošenje ovog zakona predstavlja propisivanje pravnog osnova za donošenje posebnog podzakonskog akta kojim bi se uredilo pitanje nagrade za rad advokata po službenoj dužnosti. Uzimajući u obzir činjenicu da je u Federaciji Bosne i Hercegovine u primjeni Zakon o advokaturi Federacije Bosne i Hercegovine koji je predvidio donošenje Tarife o nagradama i naknadi troškova za rad advokata u Federaciji Bosne i Hercegovine isti nije sadržavao odredbu kojom bi se uredilo pitanje nagrada za rad advokata po službenoj dužnosti.

Uzimajući u obzir činjenicu da primjena aktuelne tarife o nagradama i naknadi troškova za rad advokata u Federaciji Bosne i Hercegovine proizvodi značajna finansijska opterećenja po budžetska sredstva, neophodno je pristupiti predloženoj dopuni zakona, kako bi se definirao pravni osnov za uređenje ove oblasti putem podzakonskog akta koji bi donio federalni ministar pravde.

Predloženo zakonsko rješenje je na tragu zakonskog rješenja u Republici Hrvatskoj i Republici Srbiji gdje je pitanje nagrada za rad advokata po službenoj dužnosti propisano na način da je isti propisan podzakonskim propisom koji donosi ministar pravosuđa, dok aktuelno zakonodavstvo u Republici Srpskoj predviđa da visinu nagrade i naknade za odbrane po službenoj dužnosti utvrđuje Vlada Republike Srpske na prijedlog ministra pravde.

Osnovni razlog za usvajanje ovog zakona po skraćenom postupku jeste smanjenje finansijskih opterećenja odgovarajućih budžeta proisteklih na osnovu troškova za isplatu nagrade za rad advokata po službenoj dužnosti.

III. – FINANSIJSKA SREDSTVA

Za provođenje ovog zakona nije potrebno osigurati dodatna finansijska sredstva u Budžetu Federacije BiH.

ODREDBE ZAKONA KOJE SE DOPUNJUJU

Član 31.

Tarifa o nagradama i naknadi troškova za rad advokata (u daljem tekstu: Tarifa) određuje nagrade za rad i troškove nastale vršenjem advokatske djelatnosti kao i primjenu i stupanje na snagu ove tarife.

Skupština Federalne advokatske komore predlaže Tarifu koju odobrava Federalno ministarstvo pravde nakon konsultacija sa ostalim relevantnim ministarstvima.

Tarifa se objavljuje u "Službenim novinama Federacije BiH".

Advokat ima pravo da zahtijeva i da primi nagradu za izvršeni rad i nadoknadu troškova nastalih u vezi sa radom, u skladu sa odredbama Tarife.

Nagrada advokatima za pruženu pravnu pomoć stranci na sudu ili pred drugim organima u toku jedne rasprave ili jedne poduzete pravne radnje (pismena) u: parničnom i vanparničnom postupku, krivičnom postupku, postupku stečaja i likvidacije, zemljišno-knjižnom postupku, upravnom postupku, upravnom sporu, izvršnom postupku, postupku za upis u registar društva, postupku pred Ustavnim sudom Federacije Bosne i Hercegovine i Ustavnim sudom Bosne i Hercegovine, odnosno svim drugim radnjama koje poduzima advokat pružajući pravnu pomoć stranci, ne može prelaziti jednomjesečni prosječni lični dohodak u Federaciji Bosne i Hercegovine.

Sudovi i drugi državni organi u odluci o troškovima postupka advokata za pružanje pravne pomoći stranci određivat će nagradu advokatu prema odredbama stava 5. ovog člana, ukoliko je nagrada advokata po advokatskoj tarifi viša od iznosa iz stava 5., osim ukoliko je advokat sa svojim klijentom ugovorio visinu nagrade u pisanom obliku u skladu sa važećim propisima, što ne može opteretiti suprotnu stranu.

Skupština Advokatske komore Federacije Bosne i Hercegovine uskladit će advokatsku tarifu sa odredbama iz stava 5. ovog člana.